



KOMUNIKADO PA PRENSA

Fecha
1 di desèmber 2015

Kontakto
Kabinèt Minister VVRP

MINISTER CAMELIA-RÖMER TA REPRESENTÁ MINISTER PRESIDENTE BEN WHITEMAN: KÒRSOU KU PRESENTASHON RIBA DESAROYO SOSTENIBEL

Willemstad – Minister Suzy Camelia-Römer di Trafiko, Transporte i Planifikashon Urbano (VVRP), huntu ku un delegashon di Kòrsou, ta partisipando den e konferensha mundial di Nashonnan Uní riba tema di kambio di klima ku ta tumando lugá aktualmente na Paris, Fransia. Den e delegashon tin presente representantenan di Ministerio di VVRP, Servisio Meteorológiko, Ministerio di Salubridat (GMN) i Ministerio di Asuntunan General (AZ). Minister Presidente Ben Whiteman a apuntá Minister Camelia-Römer komo su representante na Paris.

E konferensha ofisial a kuminsá riba djaluna 30 di novèmber ku mas ku 40.000 delegado i 150 hefe di estado i Gobièrnu presente. Ta konsiderá e konferensha klimatológiko aki komo un momentu importante pa paisnan ku industria pisá ku ta krea hopi polushon, yega na akuerdonan ankrá pa redukshon di e emishon di gas aki ku ta afektá klima negativamente. En realidat tur pais na mundu - inkluso esnan ku no ta kousa e polushon nan mes - ta sufri di konsekuenshanan di klima mundial.

Pareu ku e negosashonnan entre e paisnan grandi, ta tuma lugá kasi 400 asina yamá evento paralelo den kua gobièrnunan, institutonan di konosementu i ngo's riba tur tipo di tópiko ta interkambiá e 'mihó praktikanan' i tambe 'lesnan ku por siña for di dje'. Den e kuadro ei Kòrsou a duna presentashon/workshop riba nos eksperensha ku Desarojo Sostenibel. E temanan spesífiko ku a trata ta energí renobabel, maneho sostenibel di awa, protekshon di Mangrove i restorashon di esakinan i maneho di kosta i protekshon di koral.

Minister Camelia-Römer a partisipá tambe na un reunion riba 'Small Island Development States' (SIDS) ku ta paisnan i estadonan ku ta eksperenshá problemanan similar ku Kòrsou. Akinan a papia entre otro ku paisnan donante pa ampliashon di fondo i kapasidat pa e SIDS por atendé ku e tantísimo retonan klimatológiko di un forma mas aselerá. Entre otro Banko Mundial ta bai kuminsá un programa pa apoyá paísnan limitá na kapasidat ku e ekspertisio nesesario den e ramo di skibimentu di proposishonnan pa proyekto.

Delegashon di Kòrsou a asistí na lansamentu di e 'International Solar Alliance', ku ta un iniciativa nobo di Promé Minister di India, sr. Narendra Modi i Presidente di Fransia, sr. François Hollande. Den e Aliansa aki mas ku 120 pais lo partisipá. Pa motibu di posishon geográfiko di 3 paisnan di Reino Hulandes den Karibe ku tin hopi solo, Gobièrnu di India a invitá Reino Hulandes komo un di e 11 paisnan ku lo fungi komo esnan ku ta liderá den e trayekto aki. Den e kuadro aki Kòrsou a tuma parti den e prome deliberashonnan di trabou di e Aliansa Solar Internashonal aki.



KOMUNIKADO PA PRENSA

Fecha

1 di desèmber 2015

Kontakto

Kabinèt Minister VVRP

Lo sigui duna informashon tokante e trabounan di delegashon di Kòrsou na Paris den e próksimo dlanan.

Pa mas informashon di tur e desaroyonan rondó di Minister Camelia-Römer su akshonnan por bishitá e pagina di facebook “Minister Suzy Camelia-Romer” i pa desaroyo di e proyektonan di infrastruktura, por bishitá www.oloshiii.com